



**Judicial System Monitoring Programme
Programa de Monitorizasaun do Sistema Judisial**

Komunikadu Imprensa

Periodu: Juñu 2010

Edisaun : 29 Juñu 2010

JSMP organiza Semináriu Nasionál ba Asuntu Ezerse Poder Prezidensiál ba Indultu

Iha loron 29 de Juñu 2010, JSMP organiza semináriu nasional ba asuntu indultu. Semináriu ne'e nu'udar meus no opsoins ida husi meus no esforsu sira seluk atu hatan ba preukupasaun públiku ne'ebé durante ne'e eziste iha sosiedade nia let.

Programa ba semináriu nasional ne'e ho tema **“Elaborasaun “Prátika Indultu” husi Perspetiva Polítika, Judisiariu no Perspetiva Sosiedade Sivil iha Kontestu Estadu de Direítu.**

Semináriu ne'e organiza ho intensaun atu elabora ideas no perspetivas konabá asuntu indultu no oinsá mak bele buka solusaun polítika no judisiariu ho koletivamente ba asuntu ne'e rasik. Tanbá JSMP konvensidu katak kestoins sira estadu nian nunka iha resposta únika husi individu ka grupu ida nian deit. Kestoins estadu nian *sempre no sempre* preziza resposta ka respeita no kontribuisaun koletivu hosi entidades hot-hotu.

Atu hetan ideas, perspetiva no opiniuan iha semináriu ne'e, JSMP hakbesik aan hodi husu disponibilidade ba Exeléntisimu Sr. Dr. Cláudio de Jesus Ximenes, Prezidente ba Tribunál Rekursu, Distinta Sra. Dra. Fernanda Borges, deputada no Prezidente Komisaun A Parlamentu Nasionál, Exelénsia Sra. Dra. Lúcia M. B. Lobáto, Ministra da Justisa, no husi soseidade sivil representa husi Direitór JSMP, Luis de Oliveira Sampaio. no modera husi Sr. Dr. Hugo Fernandes.

JSMP konsiente katak esforsu ne'e la'os úniku dalan atu hatan kedas ba preukupasaun, dúvida ka lamentasaun públiku ne'ebé oras ne'é kontinua moris no preukupá ita hotu nia atensaun. Maibé semináriu ne'e nu'udar meuz ki'ikoan ida atu kontribui no hodi fo hano'in ba públiku, liu-liu ba Distintu representante povu nian iha uma fukun Parlamentu Nasionál no Exelénsia sira iha Governu aktual atu oinsá mak bele hatan ba realidade ne'e.

Durante ne'e ita hotu akompañia iha diskusaun, debates, opinioins bar-barak konabá Kompeténsia Prerogativa Prezidente da Repúblika relasiona ho kestaun indultu ne'ebé Prezidente kaer bazeia ba Artigu 85 (i) Konstituisaun da Repúblika.

Iha pontu de vista ne'ebé diferente no kroat liu konabá asuntu ne'e rasik. Prezidente da Repúblika mai ho ninia pozisaun katak desizasaun atu indulta prizoneriu sira nu'udar kompeténsia konstitusional ne'ebé konsagradu iha Konstituisaun da Repúblika. Ho linguazen seluk, indultu ne'ebé Prezidente fo iha kada serimónia Loron Nasionál sira ne'e nu'udar aktu politiku *KONSTITUSIONAL*.

Iha parte seluk, politiku sira balun kontinua preukupá no reziste konabá asuntu refere. Preukupasaun ne'e mósu liu-liu tanbá seidak iha lei propria atu defini no regula kompeténsia

Prezidente ba kestaun indultu ka mekanismu perdaun sira seluk. Nune'é bele fo fatin luan ba abuzu ka uza poder konstitusional ne'ebé la tuir regras no prátika normal ne'ebé eziste iha rai bar-barak.

JSMP hanoin katak Konstituisaun da Repúblika separa klaramente kompetensia entre orgaun soberania¹ sira. Maske nune'é, dala-barak liu, JSMP observa katak iha tendensia attitude politiku ruma ne'ebé la refleta prinsipiu separasaun poder ne'e.

Aleinde ne'e, JSMP mós observa katak organizaun judisiariu sira (Tribunál, Ministériu Públiku, Defensória públiku no Advogadu sira), infrenta kondisoins ne'ebé minimu no limitadu, maibé halo nafatin esforsu hot-hotu ne'ebé posível atu hametin ita nia sistema judisiariu. Oinsá tribunál ka organizaun tribunál sira nia pozisaun konabá situaun hirak ne'e? Tanbá ne'e, maske JSMP konsidera no rekoñese katak kestaun ne'e nu'udar kompeténsia prerogativu Prezidente da Repúblika nian, maibé nafatin preukupa mós katak kompeténsia ne'e keta sai fali situaun ne'ebé kontra-produtivu ba komitmentu atu hametin sistema judisiariu ne'ebé iha faze dezemvolvimentu nia laran. SMP mós preukupa katak esensia husi justisa nu'udar nesiedade sosial, tanbá ne'e interpretaun justisa la bele haré husi perspetiva no konviksaun pesoal individu ka orgaun soberania ida nian deit. Liu-liu atu antisipa katak aktu indultu prezidensiál ne'e sei la minimíza no deskoraza autór judisiariu sira nia esforsu másimu ba hametin sistema judisiariu iha Timor léste.

Tanbá ne'e, JSMP enkoraza an atu organiza semináriu ne'e ho objetivu atu:

1. Atu hatene ideas ka pozisaun polítika husi PN konabá kestaun indultu no pasu saida mak PN halo ona atu hatan ba situaun hirak ne'e.
2. Atu hetan ideas ka perspetivas no pozisaun husi Governu ninian konabá indultu ne'ebé deklara iha kada loron nasional sira;
3. Atu elabora perspetivas no opsoins no pasu antispadas atu oinsá indultu lá sai hanesan kultura kontra-produtivu ida ba esforsu atu hametin ita nia sistema judisiariu iha Estádu de Direitu Demokrátiku ida nia laran;
4. Atu hatene perspetiva no pozisaun autóres tribunál konabá indultu ne'ebé kada tinan fornese husi Xefe de Estádu sei lá minimíza ka deskoraza servisu autór judisiariu sira ninian;
5. Atu hatene konabá perspetiva, reasaun no pozisaun husi Sociedade Sivil, bá asuntu indultu nian no nia implikasaun ba sistema justisa formal.

Semináriu ne'e realiza ho apoiu finansieru husi organizaun TAF (The Asia Foundation) no East Timor Justice Sector Support Facility (ETJSSF).

Atu hetan informasaun kle'an favor kontaktu:

Luis de Oliveira Sampaio

Dereitór Ezekutivu JSMP

Diresaun E-mail: luis@jsmp.minihub.org

Landline: 3323883

¹ Artigu 69 Konstituisaun da Repúblika